

PAULO LIWAKATETIGI EFEESIOTEDI

Nigotaga Éfeso aniboonagategemadaga leegodi aca niwigo nelegi anodita Diana, codaa me nigica ligeladi nagaca niwigo anodita Diana aneite nigica oko modogeteta. Eliodi oko dinigaanyetece owidi dinyeelo leegodi moyaa niwicidi liciagi nagajo niwigo nelegi. Paulo idiaagi nigotaga Éfeso ja domaga itoatadigida nicaagape me yatematitedibece nibodicetedi anele aneetece Cristo, codaa me diigaxinagatece lotaga Aneotedogoji. (Awiniteloco Atos 19,20; Apocalipse 2). Nigidiaagidi negepaa naga oxiiigodi João, odaa jagalatiticogi midiaa ligeladi, odaa ja yaxawa loiigi Cristo negepaa icota midiaa lemagadi.

Paulo idí nagadi liwakate me ikee Aneotedogoji me lowoogo me yatecogotee inoatawece aninoa ditibigimedi codaa me niginoa aninoa digoina iigo, odaa Cristo jegepaa iige inoatawece aninoa. Paulo aagaga yalagata Aneotedogoji aneotedogodomi Jesus naga yeleo codaa naga yewigatace. Paulo dipokoteloco loiigi Cristo ane ligeladi Éfeso, eledi yalakatititigi nigica anodaagee lewiga nigijo jotigide, codaa ikeetiogi nigica gela anodaagee me newiga. Aagaga yalagata me diniciamico lodoe Aneotedogoji judeutedi inaagina ane daga judeutedi, codaa yatemati anodaagee libakedi miditaga ane daga judeutedi. Paulo iciaceeketege nigina oko anonakato Goniotagodi nigina godolaadi anowidi liwailidi, pida idiokidi godolaadi. Eledi yalagata ica gela anejinaga me godewiga leegodi me godexogotege Cristo. Eledi najoitiniwace nigina wadonadi, eniododipi inaa nionigipi, codaa me niotagipi inaa otagododi. Owidijegi liigaxinaganegegi Paulo бага iciaceeketege lowoodi niotagawadi romaanotedi nigicoa Aneotedogoji anagaga najigotedogowa me gonajoli me godatamagateetetege Godaxakawa, diaabo.

Paulo me didikotibige me yecoaditibige loiigi

Aneotedogoji digoida nigotaga Éfeso

1 ¹Ee Paulo, ee liigexegi Jesus Cristo, leegodi Aneotedogoji yemaa me idiige, jidi nagadi iwakate notaganagaxi, jidikotibige lapo oko Aneotedogoji ane iomagaditedice mepaa nepilidi ane ligeladi nigotaga Éfeso, anidioka limedi monakato Jesus Cristo, codaa moyexogote. ²Jipokotalo Aneotedogoji ane Godiodi codaa me Goniotagodi Jesus midioka limedi mowo aneletagadomitiwaji, codaa mowo mele gadaalegenali.

Ica gobiniigi ane najigotedogowa Aneotedogoji leegodi me godexogotege Cristo

³Jogeegatalo Aneotedogoji ane Eliodi Goniotagodi Jesus Cristo, codaa me Noenogodi. Jogeegatalo leegodi mowidi anele ane najigotedogowa leegodi me godexogotege Cristo. Niginoa anele icogotedibigimece ditibigimedi me yaxawa godiwigo. ⁴Anigicatibige Aneotedogoji daga yoe nigina iigo, naga godixipetedice eotedibige me godexogotege Cristo codaa eotedibige moko nepilidi iniokiniwateda Aneotedogoji, codaa me digicata gobatiigi. ⁵Leegodi Aneotedogoji me godemaa, odaa ja lowoogo meote moko lionigipi leegodi nigijo aneotedogodomi Jesus Cristo. Odaa jigidaagee, nigijo Aneotedogoji negeote nigijo ane lowogotedogodici, ninitedibece leegodi epaa yemaa meote. ⁶Jogeegatalo Aneotedogoji aneliodi meletedogodomi. Nigica aneletogodomi ane najigotedogowa caticedi me liciagi ane jowooga. Leegodi meliodi meletedogodomi, odaa ja najigotedogowa me gonogeedi, godewiga gela, leegodi me godexogotege nigijoa Lionigi lemaanigi.

⁷Leegodi Cristo yeleo me nadoogodi lawodi leegotedi gobeyacegeco, odaa Aneotedogoji dibatetege nigijo aneote Cristo micataga daga loojedi gonaalewe, odaa agaleegoko laagetedipi leegotedi gobeyacegeco. Pida Aneotedogoji yakadi me ixomagateedice gobeyacegeco leegodi idioka limedi meliodi meletedogodomi, codaa agica daga dinetetedogodomi. ⁸⁻⁹Leegodi meliodi meletedogodomi, odaa ja najigotedogowa godixaketedi, codaa meliodi godowoogotakanegegi eotedibige me jowoogotagatece nigijo ane nikeetedogowa, ane lowoogo meote. Nigida ane nikeetedogowa, nigijo eledi oko nigijo jotigide agoyowoogodi ane diitigi, oyagaditema. Aneotedogoji ibake Cristo meote ane yemaa me loenatagi. ¹⁰Digawini ane lowoogo Aneotedogoji. Nigicota nigica noko ane nibikota, odaa ja yajigote Cristo loniciwaga me iige inoatawece aneite ditibigimedi codaa aneitedinigi iigo, odaa jegeote me ilagatiwage.

¹¹Aneotedogoji akaa lowoogo nigijo jotigide, meote inoatawece niginoa anepaa yemaa meote. Nigijo negeote lowoogo, odaa ja godixipetedice me jibagatege ane icogotibigimece miniwataga owidi nigicoa anele leegodi me godexogotege Cristo. ¹²Jigidaa aneote Aneotedogoji eotedibige modogetetalo, aneliodi me datale, leegodi oko anoko judeutedi nigijo jotigide naga inibeonagatege lanokegi Cristo. Jogokomogoko odojegipi ane inibeonagatege lanokegi.

¹³Codaa akaamitiwaji ane dagakaami judeutedi, jaganakatoni Cristo, nigidiaagidi nagajipaata natematigo anewi, nibodicetedi anele anoditece nigica anodaagee Cristo me yakadi meote oko midioka limedi me newiga miniwataga Aneotedogoji. Codaa nigidiaagidi naganakatoni Cristo, odaa Aneotedogoji ja yajigotedagawatiwaji Liwigo. Liwigo Aneotedogoji liciagi bikotaxete ane ikee me gadexocitege Cristo. Odaa Liwigo Aneotedogoji eote manibeonitege Cristo. ¹⁴Liwigo Aneotedogoji ane itogoloco nikeetogowa mowidi anele ane jibagatege miniwataga ane ligegi me yajigote loiigi. Liwigo Aneotedogoji jigidaagee me nikeetogowa nigepaagicota noko nigica Aneotedogoji nige najigotedogowa

ijoatawece nigijoa ane ligegi me najigotedogowa. Nigica noko okotawece jogeegatibigimece Aneotedogoji aneliodi me datale, codaa me loniciwengenigi.

Paulo yotaganege Aneotedogoji dipokoteloco Efeesiotedi

¹⁵⁻¹⁶Nigijo maleeka jajipatibece moyalagatibigagajitiwaji meliodi manakatoni Goniotagodi Jesus, codaa memaani inatawece eledi anonakato Goniotagodi, odaa anigica daga jamatini me iniotagodetalo Aneotedogoji leegodi inoatawece aneote makaamitagatiwaji. Idioka limedi me jipokotagalocotiwaji nigina me jotaganege Aneotedogoji. ¹⁷Iniaaginiwa Noenogodi Goniotagodi Jesus Cristo, codaa me Eliodi ane dagaxa me datale. Jipokotalo me yajigotedagawa Liwigo meote gadixaketedi, codaa me ikeetagawa anodaageeteda Aneotedogoji, amaleegaga dagaxatacice mowoogoti. ¹⁸Jipokotalo Aneotedogoji me yajigotedagawatiwaji gadowoogotakanegeco, macataga lokokena, amaleegaga owoogoti nigica gonagajegi anicota me najigotedogowa leegodi meniditedogowa moko nepilidi. Eledi jipokotalo me yajigotedagawa gadowoogotakanegegi amaleegaga owoogotitiwaji nigica ane yajigotediogi inatawece loiigi, ane lionigipi. Nigica ane yajigotediogi micoataga niginoa liicagajetecidi anowidi, codaa me dagaxa mele. ¹⁹Eledi jipokotalo Aneotedogoji meote mowoogoti nigida loniciwaga ane dagaxa me nelegi. Nigida nelegi loniciwaga joanigidaa ibake catiwedi godaalegena ane jinakatonaga, me godaxawa mepaanaga jinakatonaga. ²⁰Aneotedogoji ibake nigida loniciwaga nigijo negeote Cristo me yewigatace nigijo me yeleo, naga yadeegitedibigimece ditibigimedi, codaa negeote Cristo me nicotedini liwai libaagadi digoida ditibigimedi me ikee Cristo mida nagatetigi. ²¹Aneotedogoji eote Cristo me dagaxa me gonegegi caticedi niginoa niwicidi abeyacagaga ane niigenatakanaga, codaa me caticedi niginoa aninoa nagatetico, caticedi aninoa loniciwegeco, codaa nigina ane iniotagodeegatiogi. Cristo ida loniciwagatedeloco inoatawece ane leegitibigimece liboonagatedi digoina iigo codaa mida loniciwagatedeloco nigica eledi iigo Aneotedogoji anicota me yoe. ²²Aneotedogoji yajigote Cristo loniciwagatedeloco inatawece nelogododipi. Iniaaginiwa Aneotedogoji eote Cristo me lacilo inoatawece aninoa eotedibige me yaxawa loiigi anepoka nebiteda. ²³Nigica loiigi ane nebi micataga daga lolaadi Cristo, odaa agica ananiaditibige, liciagi inoatawece ane liidagatajedi Aneotedogoji agica ananiaditibige, igaataga iniwa Cristo inoatawece ane nipodaga.

Godewigatace leegodi naga godexogotege Cristo

2 ¹Nigijo jotigide gadiciagitiwaji émagaga, codaa leegitalo Aneotedogoji motonitedice, leegodi me daga iwagatitida codaa leegodi gadoenataka ane beyagi. ²Nigijoa nokododi nigica anenitiwaji me gadewiki liciagi anodaagee nigijo oko anida aneetege nigina iigo, codaa me iwitibece nigijo lacilo niginoa niwicidi abeyacagaga anida loniciwaga me niigenatakanaga nigina iigo, ane iige laalegenali nigina

oko ane dogoyiwaḡaditeda Aneotedoḡoji. ³Niḡijo jotigide okotawece idejinaga digo mijotaga niḡijo oko, digo anee niḡijo oko ane yewiḡatema idokida mowo niḡica ane yemaa lolaadi. Jaogate okanicodaagica ane yemaa ḡodolaadi meote, codaa eledi jaogate okanicodaagica ane ḡodiḡe ḡodowooko ane beyagi me jaoga. Odaa joaniḡidaa Aneotedoḡoji me yelatedoḡodomi leegodi ḡobeyaceḡeco, anigotediḡi me yelatetema ijotawece niḡijo oko anidioka limedi mowote ane beyagi.

⁴Pida Aneotedoḡoji eliodi me ḡodiwikode, codaa eliodi me ḡodemaa, caticedi okanicodaagica eledi oko ane ḡodemaa. ⁵Joaniḡidaa leegodi niḡijo malee ḡodiciagi oko baanaga yeleo leegotedi ḡobeyaceḡeco, odaa niḡidiaagidi Aneotedoḡoji ja ḡodexocagaditeteḡe Cristo, odaa jeḡeote me gela ḡodewiḡa. Aneotedoḡoji eote me gela ḡodewiḡa leegodi meliodi meletedoḡodomi. ⁶Aneotedoḡoji yewikatiditace Cristo, odaa leegodi me ḡodexogoteḡe Cristo, odaa ja gela ḡodewiḡa, midioka limedi me ḡodewiḡa miniwataga. Odaa icota me ḡodiweniḡide ḡodawanagaditeteḡe Cristo diḡoida ditibiḡimedi. ⁷Joaniḡidaa aneote Aneotedoḡoji eotedibiḡe midioka limedi me yakadi me ikee meliodi meletedoḡodomi caticedi ane jowooga, codaa midioka limedi meote aneletogoḡodomi leegodi Jesus Cristo ane yoetedoḡodomi. ⁸Leegodi Aneotedoḡoji meliodi meletedoḡodomi, odaa jeḡeote me gela ḡodewiḡa leegodi me jinakatonaga Cristo. Agotaga jakataga me jinakatonaga daga jibakenaga okomaga ḡodoniciwaga, pida Aneotedoḡoji ḡodaxawa me jinakatonaga Cristo, micataga daga ḡonogeeditalo ḡotiwaḡataneḡegi. ⁹Aneotedoḡoji aḡodaxawa me jinakatonaga Cristo daga leegodi me jaoga ḡodoenataka anele, doitedibiḡe diḡica ane yakadi me dinagaxaketibece. ¹⁰Igaataga Aneotedoḡoji micataga daga gela me ḡodoetace niḡijo naga ḡodexocagaditeteḡe Jesus Cristo, eotedibiḡe me jakataga me jaoga ḡodoenataka anele anakaa lowoogo Aneotedoḡoji meote, codaa me yoetedini.

Aneotedoḡoji eote mokotawece oko dinoiḡiwepodi leegodi me ḡodexogoteḡe Cristo

¹¹Niḡida makaamitiwaji aḡadanikadi miditaga noiḡi judeutedi. Odaa niḡinoa judeutedi etiḡadadalitigi me “Niḡijo ane daga dinakagiditibiḡiwaji”. Niḡinoa judeutedi joaniniḡaagina bogoyakagidi lolaadi moikkee niḡidiaagidi niḡica jotigide loiḡi Aneotedoḡoji, odaa dinanatigi me, “Niḡina oko ane idinakagitaga.” Enice analakitibiḡetiwaji anodaageni niḡijo jotigide. ¹²Niḡijo jotigide aḡica ḡanimaweneḡegi manibeoonitibiḡeḡe Cristo, Niḡijoa anenagi meote mida gela ḡodewiḡa. Micataga dagakaamitiwaji iomagaga, igaataga aḡica aneniteḡe jotigide loiḡi Aneotedoḡoji, loiḡi Israel. Aneotedoḡoji adinilakidetdagitiwaji aliciagi me dinilakideteteḡe niḡijo loiḡi meetediḡi midioka limedi miniwa miditaga. Biḡinaagoniteloco niḡina iigo, pida aḡica dagakati manibeooniteḡe Aneotedoḡoji me ḡadaxawani,

igaataga leegitalo motonitedice, codaa agaNoenogoditetiwaji. ¹³Nigijo jotigide leegitalo Aneotedogoji motonitedice. Pida natigide leegodi naga gadexocitege Jesus Cristo, odaa Aneotedogoji jegeote mipecitegetiwaji. Codaa Aneotedogoji yakadi meote nigida aneote leegodi Cristo me yeleo codaa me nadoogoditedagalocotiwaji lawodi. ¹⁴⁻¹⁵Igaataga ijaagijoa Cristo eote mokotawece oko dinoiigiwepodi, ane judeutedi, inaagina ane daga judeutedi, okotawece oko dinokaagetewamigi. Nigijo naga yeletedeloco nicenaganagate, micataga daga yanikatedi baloote ane iomagaditege judeutedi nigina ane daga judeutedi ane dinaxakawamigipi nigijo jotigide. Naga yeleo, eotedibige me dagadiaa leeditibige daga jotetenaga najoinaganagegeco codaa me nakataga ane iditedini Moisés mejogota lodoe Aneotedogoji. Joanigidaa Aneotedogoji aneote, eotedibige ane judeutedi inaagina ane daga judeutedi miditawece micataga daga dinoiigiwepodi, nigidi gela noiigi ane yexogotege Aneotedogoji, odaa jigidaa naga ilagatiwage. ¹⁶Nigijo Cristo naga yeletedeloco nicenaganagate, eotedibige Aneotedogoji me dagadiaa laxakawepodi judeutedi inaagina ane daga judeutedi leegotedi libeyacegeco. Codaa natigide leegodi moyexogotege Cristo, odaa nigidi iniwata noiigi jegeote me micataga midiokiditiwage dinoiigiwepodi, micataga daga onidateci lolaadi, odaa agaleegica daga dinelatiwage. ¹⁷Cristo enagi nigina iigo, odaa ja yatematitedibece ica anodaagigote Aneotedogoji niginoa libeyacegeco nigina oko me dagadiaa dakapetetege. Yatematitedagawatiwaji ane dagakaami judeutedi, ane leegitalo motonitedice Aneotedogoji, codaa yatematitediogi judeutedi anodipegitege Aneotedogoji leegodi jotigide nigidi me loiigi. ¹⁸Odaa leegodi me yeleo Cristo, Aneotedogoji Liwigo anokinitece godadeegi okotawece, judeutedi inaagina ane daga judeutedi, ja godadeegita lodoe Aneotedogoji ane Godiodi.

¹⁹Enice akaamitiwaji ane dagakaami judeutedi agaleegakaami iomigigipi, otegexaagaga awaligegegipi. Pida jagakaamitiwaji nigeladimigipi awanitege noiigi ane iomagaditedice Aneotedogoji mepaa nebi, anida aneetege loiigiwepodi Aneotedogoji. ²⁰Nigida makaamitiwaji gadiciagi micataga nibaloote diimigi Aneotedogoji ane yoe. Nigijoa liigexedi Aneotedogoji ijaagijoa anoyelogoditedibece lowooko Aneotedogoji nigijo jotigide, joanigidiaagidi micataga daga lipodagaladi diimigi, odaa Jesus Cristo baanaga iniaaginiwa nigica lipodagaladi diimigi ane dagaxa mida jaoga. ²¹Odaa Cristo liciagi nigina diimigi lipodagaladi anele moyojogotini, joanigidaa leegodi nigina diimigi me datiteti, codaa idoatawece liwailidi dinoxoco. Nigini diimigi Aneotedogoji ane doletibige me igodi, nigini diimigi icota me ilagatini. Odaa Aneotedogoji ja digeladetedigi. Nigini diimigi yexogotege Goniotagodi, lipodagaladi ane dagaxa mida ane jaoga. ²²Leegoditiwaji me gadexocitege Cristo, aagaga gadiciagi niginoa lanodi diimigi, anele me dinoxoco, odaa Aneotedogoji jigidiaa ligeladi, igaataga Liwigo Aneotedogoji jigidiaa ligeladi makaamitagatiwaji.

Ica libakedi Paulo me yaxawatiogi ane daga judeutedi

3 ¹Leegodi Aneotedogoji me yatecogo judeutedi inaagina ane daga judeutedi, ee Paulo, nigina me jotaganeege Aneotedogoji jipokotagalocotiwaji. Ite ee digoina niwilogonagaxi leegodi me jibatema Jesus Cristo me gadaxawanitiwaji ane dagakaami judeutedi. ²Ajawienataka nagajipaatiyecotiwaji Aneotedogoji me najigotediwa ibakedi me gadaxawani akaamitawece ane dagakaami judeutedi, leegodi meliodi meletedagadomi. ³Nigijo Aneotedogoji naga najigotediwa nigida ibakedi, odaa ja nikeetediwa eote me jowoogodi nigica ane yemaa meote, nigicoa lowooko ane digica dogoyowoogodi nigijo jotigide, me lowoogo me dibatediogi nigijo ane daga judeutedi. Ja jidikotibigagaji onatecigijoa yotaga nigijo me jelogoditedagawa nigijoa lowooko Aneotedogoji. ⁴Nigalomegenitlocotiwaji nigijoa yotaga, odaa jogowoogodi digo aneji me jowoogodi ane nikeetediwa Aneotedogoji aneetece Cristo. ⁵Nigijo jotigide Aneotedogoji aikeetediogi nigijo oko nigica ane yemaa meote nigijo naga niwakatee Cristo. Pida natigide Liwigo Aneotedogoji ja ikee ane leegodi me niige Cristo. Odaa ja ikeetediogi nigijoa liigexedi ane iomagaditedicoace miniokiniwateda modibatema, codaa aagaga ikeetediogi nigijo anoyelogoditedibece lowooko. ⁶Joanigidaagee ane ikee. Nigina nigodibatege nibodicetedi anele ane icogotedigi miniwataga Aneotedogoji, nigina ane daga judeutedi awatege niginoa judeutedi modibatege nigicoa anele anicota Aneotedogoji me yajigotediogi lionigipi. Odaa niginoa judeutedi inaagina ane daga judeutedi anodibatege niginoa nibodicetedi ilagatiwage micoataga niginoa liwailidi godolaadi me yexogotiwage mowote onidateci godolaadi. Odaa Aneotedogoji eote aneletema inatawece leegodi ligegi me yajigotediogi lionigipi, leegodi moyexogotege Cristo.

⁷Aneotedogoji najigotediwa ibakedi me ee liotagi me jelogoditedibece nibodicetedi anele ane icogotedigi miniwataga. Ibake loniciwaga nelegi nigijo naga najigotediwa ixakedi me jelogoditedibece nibodicetedi anele. ⁸Inatawece oko Aneotedogoji ane iomagaditedice mepaa nepilidi dagaxa mida jaoga caticedi ee. Pida Aneotedogoji idiwengide, codaa me najigotediwa ibakedi me jatematitiogi noiigi ane daga judeutedi, latematigo. Ejitece niginoa anele ane najigotedogowa Aneotedogoji nigina me godexogotege Cristo. Niginoa anele liciagi goniliicagajetecidi ane caticedi niginoa ane jowooga. ⁹Eleditace Aneotedogoji jegemaga nemaatediloco me jao inatawece oko moyowoogodi ane lowoogo meote nigijo naga niige Cristo. Aneotedogoji yagaditedini nigida lowoogo nigijo maleeka yoeteda nigina iigo, codaa minoatawece aninoa. ¹⁰Aneotedogoji yagaditedini lowoogo codaa nigina natigide eotedibige me yakadi me ibake gela loiigi moikee lixakedi ane digicata maniaditibige nigina me lowoogo meote okanicodaagica loenatagi. Ibake loiigi me ikeetediogi lixaketedi nigicoa niwicidi digoida ditibigimedi ane niigenatakanaga, codaa minoa loniciwegeco. ¹¹Anigicatibige Aneotedogoji daga yoe nigina iigo naga lowoogo me ibake Goniotagodi Jesus Cristo meote ane lowoogo meote, codaa

lowoogo me ibake loiigi me ikee lixaketedi. ¹²Leegodi me godexogotege Cristo, codaa me jinakatonaga, odaa abo godaalegena mejogota lodoe Aneotedogoji, codaa ajawienatakanaga me najipatedogowa. ¹³Enice jipokotagawatiwaji, jinagadinajicitini leegodi me jawikodeteloco nigida ibakedi me gadaxawanitiwaji. Pida leegodi me jawikode Aneotedogoji gadiwenigidenitetiwaji.

Paulo lotaga me yotaganege Aneotedogoji

¹⁴Leegodi Aneotedogoji me gadiwikodenitetiwaji ane dagakaami judeutedi, codaa me gadatacigi meote mida anenitege nigidi anokigitece me loiigi, jamagatedini yokotidi me idiniwikode lodoe, Eliodi Goniotagodi Jesus Cristo. ¹⁵Aneotedogoji ja iboonagateete Liboonagadi iditawece loiigiwepodi digoida ditibigimedi codaa me digoina iigo. ¹⁶Aneotedogoji eliodi loniciwaga, dagaxa me gonegegi, codaa mowidi nigicoa niliicagajetedi digoida ditibigimedi. Enice jipokotalo meote Liwigo me yajigotagawatiwaji gadoniciwaga matiteteloco gatiwagatakanegegi, codaa me gadoniciwagatitiwaji mawii anele. ¹⁷Jipokotalo Aneotedogoji meote Cristo midioka limedi miniwa catiwedi gadaalegenali leegodi manakatoni. Odaa nigina midioka limedi miniwa Cristo catiwedi gadaalegenali, jipokotalo Aneotedogoji matitetiniwace leegodi madinemaanitiwage, macataga nagana niale me dotetetini leegodi minoa litodi, codaa micataga diimigi ane dotetetini leegodi lipodagaladi. ¹⁸Jigidaa ane jipokotalo Aneotedogoji matitetiniwace amaleegaga akaamitawecetiawaji codaa minatawece niginaeledi Aneotedogoji ane iomagaditedicoace me nepilidi, oyakadi moyowoogodi Cristo meliodi me godemaa. Ajakataga me jowoogotaga nigica lemaanaganegegi Aneotedogoji, ane lica, codaa analogo dagaxa meliodi, caticedi ane jowooga. ¹⁹Jipokotalo Aneotedogoji meote mowoogoti anodaagee me gademaanitetiwaji, caticedi ane jowooga, amanagawini inoatawece ino makaamitagatiwaji niginoa Aneotedogoji ane yakadi me yajigotedagawa, codaa me digicata ane aniaditibige aneni me gadewikitema ane yemaa Aneotedogoji me eni.

²⁰Aneotedogoji jiginiaaginiwa ane yakadi meote caticedi ane jipokagatibige, codaa me caticedi ane godowoogo, leegodi ibake loniciwaga catiwedi godaalegenali. ²¹Enice, natigide jemaanaga Aneotedogoji loiigi midioka limedi moiwenigide, modogetetalo, codaa me dogoika modogetetalo leegodi ijoatawece nigijoa Jesus Cristo aneote. Odaa jigidaagee. (Amém.)

Leeditibige me godilagatiwage micataga niginoa liwailidi godolaadi

4 ¹Enice ee, ane idejote niwilogonagaxi leegodi ane ibakeditema Goniotagodi, gadiladeenitecetiawaji anodaageni me gadewiki, awii liciagi ane yemaa Aneotedogoji me eni nigijjo negeniditedagawa. ²Yemaa midioka limedi madiniwikodenitibece, makaami okaagegipi, codaa me dagakaami loidenigipi. Adinatiitogi nigina oko leegodi madinemaanitiwage. ³Adinoniciwagatitiwaji

me dagadinotigimadenitiwage, otegexaagaga adinidelegeni, pida oleetibige me gadilakiitiwage, digo anee Aneotedogoji Liwigo me gadilakidenitiwage. ⁴Oniditeci noiigi ane loiigi Aneotedogoji, liciaigi godolaadi mokiditece. Aneotedogoji Liwigo oninitece, odaa okotawece inibeonagatege idokida gonagajegi, aneniditedogowa Aneotedogoji me najigotedogowa gonagajegi. ⁵Oniniwatece Goniotagodi, codaa niigaxinaganegegi aneetece gotiwagatakanegegi eledi onidateci, codaa nigijo nilegenaganegegi eledi onijoteci, igaataga onijoteci ane leegodi me idinilegenaga. ⁶Odaa okotawece iniwa oniniwatece Gonoenogodi ane Godiodi. Jiginiaa Godacilo okotawece, codaa godibake meote ane yemaa me loenatagi, codaa okotawece digeladetediogoji.

⁷Pida nigida moko oninitecibeci Cristo najigotedogowa ane godixaketedi, ane daga diniciamico. Ilaagagaditedogoloco godixaketedi ane daga diniciamico, anepaa yemaa me najigotedogowa. ⁸Odaa jegeote nigijo jotigide aneeta Aneotedogoji lotaganagaxi, anee,

“Nigijo nogopitedibigimece ditibigimedi,
jegeote nelogododipi me liwilogjedipi.

Odaa ja yajigotediogi nogetedi nigina eledi oko.”

⁹Nigina me jalomegenagateloco mopitedibigimece ditibigimedi, odaa ja jowoogotaga me icogotibigimece ditibigimedi maleedogopitedibigimece. Odaa ja dinikatedinigi digoina iigo. ¹⁰Nigijoa ane dinikatedini, Ijaagijoa anopitedibigimece negepaa miditaga nimedi ane dagaxa me gonegegi digoida ditibigimedi. Joanigidaa leegodi me yakadi me yajacagadi codaa meote inoatawece aninoa anepaa yemaa migote. ¹¹Ijo oko ane yajigotediogi lixakedi me liigexedi, inegeledi oko бага yajigotediogi lixakedi moyelogoditedibece Aneotedogoji lowooko, inegeledi oko yajigotediogi lixakedi moyelogoditiogi oko inoatawece nipodaga me leeditibige moyiwagadi Jesus. Inatibece oko yajigotediogi lixakedi moyowoogodi modowediteloco loiigi Goniotagodi, idiaageledi lixakedi moiigaxi oko meniwigatakanaga, codaa mowo me ili eliwagatakanegegi. ¹²Yajigotediogi lixaketedi nigina oko eotedibige nigijo oko Aneotedogoji ane iomagaditedice me nigomaga modibatema Aneotedogoji, mowo me ili lolaadi Cristo, nigijo ane loiigi. ¹³Joanigidaagee icota mewi me godilagatiwage, leegodi icota mejiwagataga idiokidiwa niigaxinaganegeco anoditece gotiwagatakanegegi, codaa leegodi me igenaga me jowoogotaga Lionigi Aneotedogoji. Odaa ja godiciagi nigina oko baanaga ili me eniwagatakanaga, agica daga godagamalaga, codaa anejinaga me godewiga digo mijoataga Cristo.

¹⁴Enice jinagalee godiciagi nigaanigipawaanigi ane digicata loniciwaga catinedi niwatece, niginoa ebekadi oyalaketibigeloco, codaa niocodi ane yoniciwadi yadeegiticogi ane yemaa meyaticogi. Odaa niocodi ane yoniciwadi inaaginoa ebekadi oiciaceeketege niginoa niigaxinaganegeco ane degewiteda anoditece niginoa goneleegiwadi anodoletibige moninaaletiniwace oko. Nigidiwa goneleegiwadi oibake nimawenegeco mowote oko me eyamagaticoace, moika nigijo niigaxinaganegegi anewi. ¹⁵Pida leeditibige

me idinemaanagatiwage nigina mejinagatece niigaxinaganegeco anewi anoditece gotiwagatakanegegi. Liciagi anee me ili inatawece godolaadi, godili mejiwagatakanaga leegodi midioka limedi me godexogotege Cristo ane Godacilo. ¹⁶Leegodi loniciwaga Cristo, ane Godacilo, nigida moko okotawece godexogotiwage, godiciagi niginoa godiniocidi anodigotiogi niginoa liwailidi godolaadi me yexogotiwage, odaa jigidaagee godolaadi diba micataga dogokiditece, odaa inatawece godolaadi ili. Odaa nigida moko, anoko loiigi Cristo, godiciaco liwailidi godolaadi ane daga diniciamico. Odaa leeditibige me jaxawanaga eletidi gwowailidi me nilitibigimoace, nigina me idinemaanagatiwage.

Ica gela anejinaga me godewiga leegodi me godexogotege Cristo

¹⁷Enice, leegodi me godexogotege Goniotagodi ane idiige, ejitagawatiwaji, codaa gadibodicaxini. Jinagalee domigikani aneni me gadewiki daga liciagi anodaagee lewiga nigijo oko ane dogoyowoogoditeda Aneotedogoji. Niginoa lowooko nigidi oko agica jaogate. ¹⁸Codaa niginoa lowooko micataga daga ideite nexocaga, codaa me leegitalo Aneotedogoji moyototedice, odaa ayajigotediogi gela lewiga. Nigidi oko ayakadi daga newigatace leegodi agoyowoogodi Aneotedogoji, codaa leegodi moyakakagadi laalegenali. ¹⁹Nigidi oko agaleegoniboligatece libeyacegeco, pida ja dinajigotibigiwaji mowote inoatawece ane napioi, codaa moilidagaditibige me loomatewa okanicodaagica oko.

²⁰Pida akaamitiwaji aleegodi mawiite niginoa ane beyagi oditaga jogowoogoti Cristo. ²¹Pida leegodi mewi majipaata moditece anodaageeteda. Odaa Jesus ja niige liotaka metigadiigaxinitece niigaxinaganegeco anoditece anewi. ²²Enice ikanitiwaji nigijo jotigide aneni me gadewiki, nigijo aneni gadaagatitiwaji leegotedi galidagatakanegeco ane beyagi. ²³Odaa ikani Aneotedogoji midioka limedi meote geladi gadowooko, codaa me gela gadaalegena. ²⁴Micataga nigina oko me dinixotinigilo geladi lowoodi, akaamitiwaji adinixomitinigi gela aneni me gadewiki. Aneotedogoji eote nigida gela aneni me gadewiki digo mijoataga. Odaa nigina madinixomitinigi nigida gela aneni me gadewiki, jigikeenitiwaji gela aneni me gadewiki leegodi midioka limedi mawii ane igenaga, odaa ewi me gadewikitema iniokiniwateda Aneotedogoji.

²⁵Enice, jinagaleegawitakatiwaji. Pida akaamitawece leeditibige me enita ganioxoa inokina anewi, igaataga okotawece oko dinoiigiwepodi digo minoataga niginoa liwailidi godolaadi midiokidi godolaadi anoyexogoteloco. ²⁶Nigina midatecibece me eligidee, jinigikani gadelaga degeo mawii ane beyagi. Codaa jinegeligidee idatawece noko. ²⁷Odaa jigidaageni me digikani godaxakawa me gadiboloiteeni meote mawii ane beyagi. ²⁸Nigijo anijo molicegegi, jinagaleegolice, pida abakeni gabaagatedi mabaa manigaanyetece dinyeelo ane yapidi. Odaa jagakati maxawani nigina aninoa lagalanaga.

²⁹Jinagawii gagegi ane beyagi, ane ibeyacagadi eledi oko. Pida inoka enitece notaga anele ane yaxawa eledi oko me ili eliwagatakanegegi, ane leeditibige mowajipata. Odaa jigidaagee Aneotedogoji me yakadi me ibake gadotaga

meote anele ane yemaa meotetema nigina anowajipatalo gadotagatiwaji. ³⁰Codaa jinagawii Liwigo Aneotedogoji me agecagalo. Igaataga Aneotedogoji yajigotedagawa Liwigo eotedibige me ikee me gadiomagatitedicoace makaami epoka nepiliditeda, codaa me ikee me gadoteteni nigepaagicota noko meote me gadiwokoni gabeyacegeco nigepaa ganigicatibige. ³¹Jinagaleegikani daga abeyacege gadaalegenali, jinagaleegoteteni gadelagatema eledi oko, otegexaagaga eligidee. Jinagapaaweni eledi oko, jinaga iwoo eledi oko, codaa jinagalee beyagi mowootibige eledi oko. ³²Pida awii makaami eletema eledi oko, codaa me iwikodeni. Ikani mepaa ixomagatijo ane beyagi anowotagadomi, anee Aneotedogoji me ixomagateetedice gadoenataka ane beyagi leegodi Cristo me yleotedagadomi.

Anodaagee lewiga lionigipi Aneotedogoji

5 ¹Akaamitiwaji anakaami lionigipi, lemaanigipi Aneotedogoji. Awii digo miniwataga anee. ²Inoatawece ane gadoenatakatiwaji, awii leegodi madinemaanitiwage, digo mijoataga Cristo anee. Leegodi me godemaa, odaa ja yeledogodomi. Dinajigote Aneotedogoji micataga daga nogeedi ane yocaganeege, liciagi nigijo jotigide loiigi Aneotedogoji moyajigotalo nogetedi aneletege lanigi, codaa eijedi moyalegi owotibige Aneotedogoji me ixomagateetedice libeyacegeco.

³Nigida makaamitiwaji, akaami noiigi ane iomagaditedice Aneotedogoji mepoka nepiliditeda. Joanigidaa leegodi, jinigitinegeni ane daga gadodawa, codaa jinogowoo niginoa gadowooko ane napioi, otegexaagaga anoceetema ane nebi eledi oko. Otegexaagaga otaganitibige eledi oko, codaa otegexaagaga gadalakitibige niginoa ane beyagi nigina motaganitiwaji. ⁴Jinegenitece notaga ane napioi, jinagawii gadatematiko ane nini codaa me napioi, otegexaagaga otagani me liciagi nigina oko yetoliwaga, igaataga agotaga igenaga loiigi Aneotedogoji digidaagee me notaganaga. Pida leeditibige midioka limedi maniotagodeetalo Aneotedogoji, leegodi me najigotedogowa nigida gela godewiga. ⁵Igaataga ele me jowoogotaga Aneotedogoji me daga dibatetege nigina oko ane loomatewa okanicodaagica eledi oko, codaa nigina oko ane yowo inokina ane napioi, inaagina oko ane nocetema ane nebi eledi oko. Nigina oko oceegegi liciagi nigina oko ane dagatalo niwicidi. Odaa jowoogotaga Aneotedogoji me daga ikatediobece nigidi oko me dakatiobece miniwataga, midioka limedi meite lodoe, otegexaagaga me Cristo lodoe, aneite lionigipi modibatege icoatawece Aneotedogoji ane lagajeditetege.

⁶Jinigikanitiwaji digica ane gadinaaleni, nigina aneetece notaga ane digica ane jaogate. Igaataga Aneotedogoji yelatetema codaa me iloikatidi nigina oko ane dogoyiwagaditeda, codaa anowote niginoa ane beyagi baanegejinagatece. ⁷Enice, jinagawanitege nigina oko ane dogoyiwagaditeda Aneotedogoji.

⁸Igaataga nigijo jotigide adeonitetiwaji nexocaga leegodi nibeyacaga ane nexocagadi gadaalegenali. Pida natigide Goniotagodi ja yajigotedagawatiwaji

nilokokena, nigijoa latematiko, leegodi me gadexocitege. Enice adeegi gadewiga me ikee mani nilokokena Aneotedogoji catiwedi gadaalegenali. ⁹Igaataga nigina oko anani nilokokena Aneotedogoji minitaga, nigini oko eote inoatawece aneletema eledi oko, codaa inoatawece aneote igenaga, codaa ainaale eledi oko. ¹⁰Oleetibige mowoogotitiwaji nigica ane yocaganene Goniotagodi.

¹¹Jinagawanitege loenataka nigina oko ane idei nexocaga. Niginoa loenataka agica jaogate. Pida abakeni ganilokokenatiwaji mikeenita me beyagi loenataka nigina oko ane idei nexocaga. ¹²Igaataga godiboliga, digidioka limedi mejinagatece loenataka ane beyagi nigina oko anoyagaditedi mowote. ¹³Pida lokokena ikee inoatawece anele, inaaginoa ane beyagi, nigina me jadeegagata manitaga lokokena. Igaataga ane ikee anodaageeteda niginoa ganicinao, aniaagani lokokena. ¹⁴Joanigidaa leegodi nigijo ligegi Goniotagodi, anee,

“Aniwoti,

akaami ane iote!

Codaa akaami adabititini ane awanitege émagaga!

Odaa nilokokena Cristo ja nalotagaloco.”

¹⁵Enice adowetiteloco anodaageni me gadewiki. Jinaga gadiciagi nigina oko ane digicata lixakedi, pida abakeni gadixakedi Aneotedogoji ane yajigotedagawa me gadewikitema. ¹⁶Oleetibige minoatawece ganokododi ikeeni ane yemaa Goniotagodi, igaataga niginoa nokododi nigina oko owote owidi ane beyagi. ¹⁷Enice jinaga gadiciagi nigina oko yetoliwaga, pida oleetibige mowoogoti nigica ane yemaa Goniotagodi mawiitiwaji.

¹⁸Jinagacipeta viinyo daga adinemakatiti, igaataga gadibeyacagatitiwaji. Pida ikani Liwigo Aneotedogoji me gadajacagati. ¹⁹Adinotaganegenitiwage madinaxawani mawii me ili gatiwagatakanegegi, abakeni lotaga Elaco Davi aniwotelogo Aneotedogoji lotaganagaxi, codaa abakeni eletidi Enaco, aniwotelogo Aneotedogoji lotaganagaxi. Odaa nigina me agaani niginoa Enaco, agaani manitawece gadaalegena mogeetetalo Aneotedogoji.

²⁰Idioka limedi maniotagodeetalo Aneotedogoji ane Godiodi leegodi inoatawece ane yoetedogodomi. Nigina maniotagodeetalo, abakeni nagatetigi Liboonagadi Goniotagodi Jesus Cristo.

Anodaa leeditibige minigata gododawa

²¹Ele midioka limedi me eemiteetibige eledi oko leegodi me eemiteetigi Cristo.

²²Akaami iwaalepodi, iwagati gadodawadi, digo anemiitalo Goniotagodi me iwagati. ²³Igaataga nigina goneleegiwa jiginiia lacilo nagana lodawa, odaa joanigidaa leegodi mida liigenatakanegegiteloco, liciagi Cristo me lacilo loiigi, odaa niginoa liigenatakanegegitedogoloco. Jiginiiaaginiwa ane Newikatitogodi loiigi, ane liciagi epaa lolaadi. ²⁴Enice, digo minataga loiigi Cristo moyiwagadi, odaa jigidaagee iwaalepodi me leeditibige moyiwagadi inoatawece ane liigenatakanegeco nigina lodawa.

²⁵Akaami goneleegiwadi leeditibige memaani gadodawa, digo mijoataga Cristo me yemaa loiigi, codaa me dinajigo me yeleotedogodomi. ²⁶Cristo dinajigo me yeleotedeloco gobeyacegeco eotedibige me yakadi me iomagaditedice loiigi anepoka nebiteda, codaa me iwilegitetema loiigi inoatawece ane beyagi. Nigina meote nigida loenatagi, ibake lotaga me yawalacetetege loiigi ane beyagi, odaa ja iige nigina oko me dinilegetibigiwaji moikee naga iwilegitetema libeyacegeco laalegenali. ²⁷Joanigidaa aneote, meote mepaa nebi, nigidi noiigi agalee laagetedipi, ane yakadi miniokiniwateda me nebi. Yemaa meote nigidi loiigi macataga awicije libiniena baanaga nibeotege me wado, analeedigica liwakapagajegi lolaadi, otegexaagaga gaantokaagidi eledi libeyacagajegi. ²⁸Odaa jigidaagee niginoa goneleegiwadi me leeditibige moyemaa nagana lodawa digo anee moyemaa epaa lolaadi. Nigina ane yemaa lodawa iniaagini epaa dinemaa. ²⁹Agica ini oko ane daga yemaa epaa lolaadi. Pida inatawece oko niodaga modowedeloco epaa lolaadi, digo miniwataga Cristo me doweditedeloco nigina loiigi ane iomagaditedice. ³⁰Doweditedeloco leegodi moko micoataga niginoa liwailidi lolaadi Cristo. ³¹Mee Aneotedogoji lotaganagaxi, “Goneleegiwa ika eliodi, eliodo, odaa ja dinixigitege nagana lodawa. Odaa nigidi iniwataale micataga dogokinitece oko.” ³²Nigidiwa notaga ida ane niitigi codaa nigina anida ane jaoga. Nigidiwa notaga oikee Cristo idiaa loiigi me liciagi goneleegiwa aniaa lodawa, leegodi me micataga dogokinitece oko. ³³Pida ejitacagawatiwaji. Inoatawece goneleegiwadi leeditibige moyemaa lodawa digo anee mepaa dinemaa. Codaa inatawece iwaalepodi leeditibige me deemitetibige lodawa.

Nionigipi inaageniododipi

6 ¹Anakaami nionigipi, leeditibige me iwagati gadiododipi, leegodi me gadexocitege Goniotagodi. Codaa jigidaa ane igenaga mawiitiwaji. ²⁻³Ijo liigenatakanegégi Aneotedogoji anee, “Eemiteetibige gadiodi, codaa me gadiodo.” Codaa eleditace mee Aneotedogoji, “Amaleegaga inoatawece eletagadomi, codaa mowidi nokododi me gadewikiteloco nigina iigo.” Nigijo Aneotedogoji naga diigenataka me leeditibige me jeemiteegatibige godiododipi, nigida liigenatakanegégi jigidaa odoejegi leegodi Aneotedogoji me ligegi meote aneletema nigina anoyotete nigida liigenatakanegégi. ⁴Akaamitiwaji anakaami eniododipi, jinagaliidagati gadionigipi mawiitibige me neligideega. Pida nigina maliidagati gadionigipi, leeditibige mele madowetiteloco, iigaxini, codaa maladeeni anodaagee Goniotagodi me godiigaxi.

Niotagipi inaaginoa niotagododi

⁵Akaamitiwaji anakaami niotagipi, iwagati ganiotagodepodi digoina iigo. Eemiteetibige codaa me adoitiogi, codaa catiwedi gadaalegenali emaanitibige mawii inoatawece anoiigetdagawa, micataga daga Cristo nigini ane iwagati. ⁶Jiniginoka awii anoiigetdagawa nigina metigadiwini, jinagawii liciagi nigina

ane doletibige midokida me docagatiogi oko. Pida idioka limedi me iwagatakani, icaagica nige digica ane igoaditagawa, anee niginoa liotaka Cristo, me dinoniciwagaditibigiwaji mowote ane yemaa Aneotedogoji. ⁷Aniitibecitiwaji nigina mabaa micataga dagabaatema Goniotagodi, idigida agabaatema goneleegiwa. ⁸Analakitibigetiwaji Goniotagodi micota me yedia loojedi nigijo libakedi anele aneote nigijo oko, icaagica nige niotagi, ogoa domige otagodi.

⁹Akaamitiwaji anakaami otagodepodi, oenitibigo gaotagipi idokidata anemiitiogi, codaa jinaga adoenitibigo. Pida analakitibige miniwa Ganiotagodi makaamitagatiwaji, aniniaaginiwa Niotagodi niginoa gaotaka, ane ideite ditibigimedi. Goniotagodi agica lilicotagi, inatawece oko idokida anigotediogi.

Ane najigotedogowa Aneotedogoji me godotetema godaxakawa

¹⁰Inioxoadipi, jiditedini niginoa owidijedi yotaga. Leeditibige madinoniciwagatiteloce gatiwagatakanegegi leegodi me gadexocitege Goniotagodi, odao ja yajigotedagawa eliodi nimawenegegi. ¹¹Abaatege icatawece nigica ane najigotedogowa Aneotedogoji ane godotetema diaabo ane godaxakawa. Nigina me jibakenaga Aneotedogoji ane najigotedogowa me jotetagatini, odao jakataga me jatitagatini nigina diaabo me ibake nimawenegeco micaanigigotogowa. ¹²Igaataga ajidelegenaga oko anepaga jakataga me jinataga, aninoa libole codaa me lawodi. Pida jidelegenaga lacilodi niwicidi abeyacagaga, aninoa notoetico, codaa me niginoa lacilodi niwicidi abeyacagaga anonadeegita nexocaga nigina okotigi nigina iigo. Jidelegenaga inoatawece ane niwicidi abeyacagaga inoatawece ane nipodaga digoina natinedi iigoteloco. ¹³Enice, abaatege icatawece nigica Aneotedogoji ane najigotedogowa me gonajo me daga godakadi ane beyagi. Odao joanigidaa me jakataga me jibogatege ane beyagi anigida noko minoa ane beyagi, nige icaanigigotogowa godaxakawa. Odao nige ixomagatijo me jidelaga, idokee me jatitagateloce gotiwagatakanegegi, ainojicenaga.

¹⁴Enice, leeditibige me gadigomitiwaji. Micataga nigina iodagawa me dinixotinigilo lowoodi me dinowedi, jigidaagee me adinixomitiwaji. Nigina motaganitiwaji codaa mowoo nigina anewi, odao nigina anewi micataga daga ganigoenagadi. Nigida anee gadewiga me igenaga, micataga daga nagana noecagaxi iodagawa elipogo ewacogo me dinowedi. ¹⁵Niginoa nibodicetedi anele anetigodiigaxitece anodaagee Aneotedogoji me yakadi meote mele laalegenali oko, niginoa nibodicetedi anele micataga daga niginoa gawelatedi anele. Nigina me gadigomitiwaji memii atematiitedibece nibodicetedi anele, odao ja micataga daantaga adinixomitinigilo nigidiwa gawelatedi. ¹⁶Codaa ele midioka limedi mabakeni gatiwagatakanegegi me gadotetenitema okanicodaagica anigotagawa godaxakawa me dineetagawa. Gatiwagatakanegegi micataga daga nigina loligojegi iodagawa, ane yolitege nopitenali ane godalegi. ¹⁷Nigina gela



(Efésios 6.14)

godewiga godotete liciagi lamakaladi iodagawa me yotete lacilo. Odaa lotaga Aneotedogoji oiciaceeketege iodagawa lodaajo-ocagataga. Aneotedogoji Liwigo najigotedogowa lotaga eotibige me idinagakatitagatalo, codaa me jigekenaga godaxakawa. ¹⁸Ele midioka limedi motaganegeni Aneotedogoji, odaa nigina motaganegeni, idioka limedi mikani Aneotedogoji Liwigo me gadaxawanitiwaji motaganegeni, codaa mipokitalo. Nigina motaganegeni Aneotedogoji, adinowetitiwaji ade dinelio gatiwagatakanegegi, pida ipokiteloco inatawece loiigi Aneotedogoji.

¹⁹Eleditace nigina motaganegeni Aneotedogoji, eemodeledi ipokitiloco, amanagawini Aneotedogoji nikeetediwa anejatigi igege, codaa meote mabo yaalegena me jotaga.

Odaa jigidaa me jakadi me jelogodi

nibodicetedi anele ane dogoyowoogoditeda nigijo oko nigijo jotigide, pida natigide Aneotedogoji ja nikeetedogowa. ²⁰Aneotedogoji eote me ee liigexegi minataga eledi noiigi me jelogoditedibece nibodicetedi anele, odaa leegodi me jelogoditibece nigida natematigo, ite ee ina ja idinigoetini catiwedi niwilogonagaxi. Pida ipokitalo Aneotedogoji meote mabo yaalegena me jelogoditedibece latematiko ane leeditibige mejigotalo me jatemati.

Owidijedi Paulo lotaga me yecoaditibige Efeesiotedi

²¹Natigide, jigicaagica Tíquico jagaga yadeegitagawatiwaji inoatawece gabodigitibigiji. Tíquico gonioxoa godemaanigi, codaa jakataga me jinakatonaga nigina me godaxawatece gobakedi ane najigotedogowa Goniotagodi. Yatematitedagawa inoatawece ane jixomagateenagatedice digoina anejonaga. ²²Joanigidaa leegodi me jiige migo makaamitagatiwaji, amaleegaga owoogoti anodaagejinaga, amanagawini abo gadaalegenalitiwaji, me daga akaami agecagalodipi.

²³Jemaa Aneotedogoji, Godiodi, codaa me Goniotagodi Jesus Cristo mowo mele laalegenali iditawece gonioxoadipi, codaa mowo miditawece dinemaatiwage, codaa midioka limedi monakato Aneotedogoji. ²⁴Eledi jemaa Aneotedogoji meliodi meletetema inatawece nigina anidioka limedi moyemaa Goniotagodi Jesus Cristo, agokowo moyemaa.